

唐·釋道宣撰

淨心誠觀法

財團法人佛陀教育基金會 印贈



佛滅度後  
已恭慶師

歲次癸酉於妙釋寺講四分戒本正月廿一  
二溥益大師涅槃日始二月十五佛涅槃日圓滿  
普潤法師護持贊助書此以表敬志功德

慧苑四院沙門景吟并識

# 淨心誠觀法 目次

淨心誠觀法序·····	7
淨心誠觀法·····	8
淨心誠觀法五字釋名篇第一·····	9
誠觀序宗法第二·····	10
誠觀五停心觀法第三·····	12
誠觀末法中校量心行法第四·····	16
誠觀六難自慶修道法第五·····	18
誠觀世相如夢修出世善根法第六·····	19
誠觀破戒僧尼不修出世法第七·····	20
誠觀外現威儀內起邪命法第八·····	22

## 淨心誠觀法目次

3

## 淨心誠觀法

4

誠觀取相恃善誑佛法第九·····	24
誠觀慢天懼人屏處造過法第十·····	25
誠觀女人十惡如實厭離解脫法第十一·····	27
誠觀檀越四事從苦緣起出生法第十二·····	31
誠觀六道流轉受報無窮法第十三·····	32
誠觀八風力大智者不動法第十四·····	34
誠觀身心相苦惱過患法第十五·····	35
誠觀詐善揚名口清心濁法第十六·····	36
誠觀衆生各著依正二報法第十七·····	38
誠觀煩惱結使法第十八·····	39
誠觀十八界假緣生法第十九·····	41
誠觀修習安那般那假相觀法第二十·····	43
誠觀善惡相資法第二十一·····	44

誠觀六道衆生善惡因果法第二十二	46
誠觀行者善護戒財塵賊止劫法第二十三	48
誠觀世諦第一義諦法第二十四	50
誠觀晚出家人心行法第二十五	51
誠觀對發菩提心法第二十六	53
誠觀教化衆生法第二十七	56
誠觀佛性不二非有無含中道不著中法第二十八	62
誠觀智差別福田不等法第二十九	65
誠觀內行密修囑付殷勤受持法第三十	67
附錄 二十五護戒善神說明表	71
附錄 守護三歸三十六部神王所主表	74

淨心誠觀法目次

淨心誠觀法

# 淨心誠觀法序

餘杭郡沙門釋元照述

太近至易無如自心。入死出生了不知覺。其體明瑩。其量包容。故使一迷遽生諸法。其猶寶鑑。因明而像生。又若長川。緣澄而波動。謂心異物。爲物轉心。吸攬塵緣。積成勞結。淪歷諸有。沈屈己靈。餘趣無知。人倫尠學。縱令聽習。多墮邪癡。奔逐名聞。封著知解。至有江南江北走覓菩提。曲見邪心未嘗正直。野猿騰躍。家犬遲迴。勞我聖師。提耳垂誨。曲留妙藥。的指病根。囊括兩乘。津通萬行。託彼親度。用表弘慈。囑使竊闖。特彰祕勝。深訶講論。苦勉修治。然古德傳通。雙弘教觀。諸部則以教開解。斯文乃以觀示修。既非無目而遊。豈是數他之寶。須信。從眞起妄。舉體現前。達妄即眞。不從他得。淨心之要。覽者宜知。

淨心誠觀法序

7

淨心誠觀法

8

# 淨心誠觀法

唐 終南山沙門釋道宣撰

敬禮三寶藏

薩婆若法身

隨力誠初學

惟聖哀愍聽

時在隨州興唐伽藍。夏安居。撰令送泰山靈巖寺付慈忍受持。凡三十篇。如左。

釋名篇第一	序宗篇第二	五停篇第三	披量篇第四
自慶篇第五	善根篇第六	破戒篇第七	邪命篇第八
誑佛篇第九	造過篇第十	解脫篇第十一	食緣篇第十二
流轉篇第十三	不動篇第十四	過患篇第十五	心濁篇第十六
二報篇第十七	結使篇第十八	緣生篇第十九	安般篇第二十
相資篇二十一	因果篇二十二	止劫篇二十三	二諦篇二十四
心行篇二十五	菩提篇二十六	教化篇二十七	佛性篇二十八
福田篇二十九	受持篇三十		

淨心誠觀法五字釋名篇第一

淨心者。於汝現行煩惱諸部過患。教修對治。令汝即時隨分解脫。垢染漸滅。心轉明淨。發生定慧。起於大乘清淨信心。趣向菩提種性住處。以今微因。後感當果。是故教汝察病對治。興隆功業。修入信境。成決定根力。其三賢十聖。無垢妙覺。四十二地。空宗真理。唯可知聞影像羸相。下地凡夫。力所未及。亦未能行。今唯使汝淨除業鏡客塵瞋等。見汝身中少分佛性。汝可飲服般若甘露。洗蕩蓋纏。漸顯淨心。心若清淨。令衆生界淨。衆生既淨。則佛土淨。始除煩惱。令戒清淨。戒既完具。定復清淨。以戒定淨。令智慧淨。智既淨已。顯自身源。有此義故。名爲淨心。已下諸篇。治過雖別。同名淨心。誠者。令汝識知對治初門。先除羸染根本惡業。知病知藥。守心慎口。勵己修道。離過患。故名誠。觀者。察義。觀察此誠。與佛法相應不相應。及障道過患。名字句偈。審諦思量。如實

解心。得誠本意。又能隨順止觀二門。此二法者。定始慧初。生長一切禪支道品。故名觀。法者。即此誠文。首軸次第。慇懃曉示。欲使禁斷煩惱。止諸惡業。加行勝進。住不退心。故名爲法。下諸篇中。皆有此淨心誠觀法五義。當須知之。

誠觀序宗法第二

夫欲修道。於三業中。先斷財色二種。若不貪財。即無諂諍。若不貪色。即無熱惱。經曰。背捨離欲。順菩提分。當修身觀。精勤一心。除世貪愛。制伏垢惱。令心清淨。以斷財色。成無漏善根。薰本識中。成無貪種子。漸盡惑染。入賢聖位。今見解法人等。仍貪財色。長養結使。與諸漏相應。惡業繫縛。墜三惡道。經云。既非道人。又非白衣。無所名也。多求利故。專習唇吻。莊補華綺。戲論諍訟。遞相謗嫉。三毒轉強。煩惱增長。沈淪苦海。知而故犯。無解脫時。千佛出世。不見不聞。以是因緣。地獄罪畢。受惡龍身。

爲盜佛衣食。破戒曠垢。所得惡果。如盲龍經說。即知解義。不救業苦。汝宜依誠。如說修行。隨病對治。隨分解脫。不可口言而得清淨。三毒五結。何者偏重。先治重者。輕即自差。披戒定鎧。摧心魔賊。一切苦因果。財色爲本。一切樂因果。戒定爲本。然此因果。悉在衆生心微塵中。何故不禁餘過。先誠財色。大乘經云。八萬四千障道罪業。悉因財色以爲根本。何以故。十方衆生。無始已來。爲財相殺者。過微塵數。爲色相殺者。數復過是。道俗二流。爲於財色。今現有一百二十六大地獄中。受千萬種苦。經無量劫。始入畜生餓鬼。縑素二人。同爲財色之所傷害。初持後犯。能免者稀。若有斷者。名菩薩行。名眞持戒。名爲賢士。名佛弟子。財色二事。相欲似輕。感罪尤重。河沙誑惑。由財色起。此之二過。能壞君臣師徒夫婦等。亦壞內外親族朋友知識。若離財色。更無世間人天脫苦。聖凡同讚。諸漏滅盡。進至佛果。爲此先誠財色二種。

誠觀序宗法第二

11

淨心誠觀法

12

因色生憍。因財生吝。憍而且吝。雖有餘德。亦不足觀。先斷財色。使功行成立。後聽經論。即是入道次第也。言逆行疾。故名淨心。偈曰。

煩惱如河沙	先斷惡二種	一財二是色	死時神不恐
吉羅須護持	況言犯四重	三聚戒清淨	布薩心喜踊
鄙夫愛財色	誠汝斷貪著	由財三世苦	因色入火鑊
色能障聖道	財能令行薄	審諦自看心	知貪是狂錯
智避如火坑	頑愚不嫌惡	若犯當悔除	除已更勿作
一切有形類	終歸填溝壑	持戒禁情苦	後受大安樂

誠觀五停心觀法第三

五妄想者。如除刺樹。先斷其根。故修五停。觀息五過。止不令起。故名停心觀。因修此觀。現惱不行。得小解脫。所由之處。戒定調柔。漸證神通。名大解脫。十障滅盡。名眞解脫。莫不因今五停觀

法。如是修入。名爲淨心。偈曰。

自知欲情多	一向觀不淨	背捨得解脫	欲竭即得定
若當逐講論	念欲轉熾盛	是即非對治	下道入險徑
自知瞋恚多	一向修慈悲	毒火得清涼	成就善律儀
若當逐講論	非治徒勞疲	貪瞋更增長	重被煩惱羈
自知愚癡多	諦觀十二因	始悟輪迴苦	了知無我人
若當逐講論	見諍終日喧	放本求枝葉	不能拔斷根
自知我慢多	諦觀十八界	方得無人解	吾我病即差
若當逐講論	反益三塗債	計我常求勝	名利自杻械
自知亂想多	常數出入息	覺觀漸得成	加我戒定力
若當逐講論	喧塵未能息	遞互相是非	何時滅事識

此是毘曇中七方便法。五停觀成。名第一方便。自餘別相念處。總相念處。煥法。頂法。忍法。世第一法。名七方便。觀行成就。得

誠觀五停心觀法第三

13

淨心誠觀法

14

須陀洹果。若初入道大小乘人。通修此觀。偈曰。

何因說五停	復不逐講經	抱疾說藥方	祇欲取聲名
凡夫貪利養	無心治妄情	若修五停觀	決定修道成

何故令修五停觀法。止逐講論。有二要法。一者佛教次第入道。對治麤重煩惱。二者見解法義人。知而故犯。不畏佛戒。不修威儀。五篇淨戒。悉皆破盡。見他持戒。復起憎謗。唯貪財色。瞋惱鬪諍。慳嫉憍慢。無漸無愧。身壞命終。必墮地獄畜生餓鬼。經歷多劫。當觀此事。現前驗知。故修五停。止過起道。順佛教故。名爲淨心。偈曰。

貪如豺狼性	瞋如惡龍心	壞法故毀禁	污戒犯姦淫
識法望除毒	反更作罪深	造業心無悔	命過就刀林
墮大無間獄	佛性歷劫沈	如職除名罰	失勢不堪任
云何破戒口	噉人食憍恣	云何破戒手	受人財物施

云何破戒身 坐臥好床褥 云何破戒業 受他禮已足  
云何破戒行 默受稱揚讚 若犯此五事 諸天共悲歎  
佛教新受戒者。五年學律。然後學經。律有五部。一四分。二五分。三十誦。四僧祇。五解脫。此五部律。同一毘尼大藏。文相廣博。卒難悉識。今欲知者。財色爲宗。能斷財色。即名奉律禁戒清淨。發生定慧。成就聖道。知律綱要。故名淨心。偈曰。  
五部戒律中 宗要斷財色 修禪觀不淨 對治自忍抑  
林野歎死屍 內心懷悲惻 我身會當然 貪熱即時息  
三毒甚強盛 摧之用智力 衣求破弊衣 食即一坐食  
常行平等心 淨意恒質直 若不能如此 袈裟覆荊棘  
聖教萬差。爲根性不同。病藥衆多。愚者致惑。雖用功力。非正對治。妄貪名利。更增塵垢。是以先修五停。後學講論。知道次第。名爲淨心。偈曰。

世人習多聞 未曾行一分 妄情取妄法 諍競起紛紜  
入道依次第 戒定自資薰 淨命如迦葉 勿得同六羣  
誠觀末法中校量心行法第四

凡夫解義。皆因聽學。爲知法人身犯四重。畜八不淨財。食噉俗饌。無羞無恥。知而故犯。不畏後世。是故令汝校量心行。先淨禁戒。後方聽經。汝用五誠。得名淨心。古者大德講華嚴經。唯一卷疏。於後法師。作三卷疏。今時講者。十地一品。出十卷疏。各逞功能。競顯華詞。文字浩博。寄心無所。然文者當體即義。何須人語。今時愚人。竟求於名。不求於法。法尚不可著。何況著文字。法離文字。言語斷故。大集經曰。經文是一。講者異說。各恃己見。壞亂正法。天神瞋故。三災俱起。以是因緣。佛法淡薄。如一斛水。解一升酪。看似酪色。食即無味。諦思講論人情測佛。佛智境界。豈人能測。如是審察。名爲淨心。偈曰。



敷演說法師	二種陞高座	一者福無量	二者離罪過
慈心成就人	法施勝財貨	瞋垢是非他	棘刺上坐臥
有漏爲基堵	無明作根本	解經不除毒	法師自傷損
賊心求名利	忽忽未思忖	嬰孩欲登梯	先須戒足穩
學士聰明者	舉動多輕躁	或有錯解義	邪見復顛倒
是故定治動	七覺中法要	定慧平等修	種智得微妙
世尊在世時	唯教修出離	習善莫生足	少惡即遠避
念念觀無常	勤修真對治	寂慮學禪那	何須著文字

何因世尊在世時。悉得聖道。及生天中。依次而學。不越毘尼。入道有方。五年習戒。夜則修定。攝心守境。安處林野。不畜餘食。少欲慚愧。一心諦觀無常不淨。離諸調戲。意不散亂。舉動進止。恒令淨潔。無惡姿容。先意問訊。以是善緣。悉得道迹。汝能一心依此學者。名爲淨心。偈曰。

誠觀末法中校量心行法第四

17

淨心誠觀法

18

正法證道時	淨法調衆生	隨事秉羯磨	除垢獲三明
像法盡至末	羯磨廢不行	雖復似和合	集則起鬪諍
凡是諸經律	甘露亦毒藥	解服百疹瘰	不消病發作
知法不向心	解經行轉薄	棄捨戒定業	文字處起著
所以韻句撰	讀時心歡樂	靜坐好思量	觀察自忖度
何緣重頌偈	文少義廣博	依誠益汝身	信受勿疑惡
或見他毀罵	輕賤心漠漠	此約大乘教	與理不違錯

### 誠觀六難自慶修道法第五

一者萬類之中。人身難得。如提謂經說。今得人身。難於龜木。二者雖得人身。中國難生。此土即當邊地之中。具足大乘正法經律。三者雖有正法。信樂復難。今隨力信。不敢疑謗。四者人身難具。今受男形。根無殘缺。相貌成就。五者雖具男形。六根無缺。五欲纏染。出家甚難。今得割愛出家修道。披著佛衣。受佛淨戒。六者

雖受禁戒。隨戒甚難。汝可於戒律中。尊重愛樂。慚愧慎護。於此六事若不觀察。即便放逸。深障聖道。既超六難。常應喜慶。難得已得。得已莫失。如是思量。名爲淨心。偈曰。

世有六種難	難得已得具	勤修戒定慧	善解名味句
是故學大乘	問即須知處	受他檀越食	飽腹無智慮
無智長貪瞋	不能如法住	犯禁毀戒足	命終生四趣

### 誠觀世相如夢修出世善根法第六

云何方便。能令衆生。離苦出世。但愚人貪愛。我即不貪。何者是名世愚貪愛。所謂官榮封賞。車馬庫藏。臺觀園林。采女音樂。上服美饌。遊戲射獵。宴會倡伎。嫁娶賓席。恃怙族姓。追朋逐勢。三軍列陣。前鋒精銳。謀策將略。果毅傷殺。平殄除蕩。快意適情。攻城破柵。收縛簿斂。刀筆豪俠。意志建立。俗藝醫方。工巧居積。攝斂奠祭。以要言之。如此衆多世務。無量殺害。飲酒噉肉。鬪諍。

誠觀世相如夢修出世善根法第六

19

淨心誠觀法

20

勝負。怨讎熱惱。悲喜安危。吉凶禍福。能於此中悉捨離者。名眞修道出世人也。衆生迷倒。於此世事。謂是真法。不知無數劫來。生死大苦。身壞命終。墮三惡道。恒河沙劫。受大燒煮。雖遭此苦。仍於生死貪著無厭。迭相承習。迷惑塵境。皆由未值善導。未聞正法。汝今既聞。如聞修學。名爲淨心。偈曰。

凡夫狂癡性	所見常不正	資養三毒身	貪瞋轉增盛
未觀屍穢形	持糞如行屏	常遊違順境	詐僞起諂佞
實無常我樂	妄見常我淨	罪業顛倒故	恒遊諸險徑
智者如實解	慧命心決定	觀世如夢幻	窮眞道成聖

### 誠觀破戒僧尼不修出世法第七

僧尼破戒者。所謂畜養奴婢。僮僕牛驢車乘。田宅種植園林華果。金銀粟白。屏風氈被。好枕細席。箱匱盆瓮。銅器盤碗。上好三衣。牙床坐褥。房舍退屋。厨庫碓磨。脂麵藥酒。雜鮭醬酢。異種口味。

王公貴重。多人顧識。生緣富貴。數過親舊。餉送弔問。申訴衙府。身爲衆首。門徒彊盛。講說相難。好喜音樂。常居一寺。評量僧事。迭相擯罰。借問早潦豐儉盜賊水火毒獸之事。經過酒店市廛屠膾獵射之家。親友婦女。琴瑟詩賦。圍碁雙陸。讀外書典。高語大笑。嫌恨諍競。飲酒食肉。綾羅衣服。五色鮮明。勤剃鬚髮。爪利如鋒。畜八不淨。財寶富足。於此等事。貪求愛著。積聚不離。名眞破戒。經曰。此等比丘名禿居士。名披袈裟賊。名禿獵師。名三塗人。名無羞人。名一闍提。名謗三寶。名害一切檀越眼目。名生死種子。名障聖道。遠離此等十種惡名。卽爲淨心。偈曰。

可怪凡夫人	積聚貪瞋癡	破戒無羞恥	輕賤木叉珍
追求忙如火	種植涉艱辛	教他多布施	自捨若抽筋
傲慢善知識	恃怙膿血身	放逸著五欲	何時出苦津
衣貪五色服	食貪常飽肚	捨靜入憤鬧	經戒未曾覩

誠觀破戒僧尼不修出世法第七

21

淨心誠觀法

22

拔草復掘地	漑灌治園圃	生業過俗人	瓮匱居三五
唯憂財不足	鎖門牢閉戶	高聲大語笑	諂慢心未普
毀犯四重禁	觚突兇如虎	身壞永沈淪	罪畢生夷虜
可念衆生犯	癡暗無慧光	但貪目前利	不見當來殃
出家望靜樂	返爲馳逐忙	抱財忽命終	道俗竟分張
惡性如蛇蝎	惡貪如豺狼	剃頭無實德	高容返自傷
隱罪求名聞	不畏利養瘡	白衣修戒施	壽盡生天堂
沙門倒慳惜	不觀空無常	唯知造惡業	觸事皆面牆
破戒違律儀	無慚故覆藏	我作還我受	三塗遣誰當
雖無我人法	善惡亦不亡	三界輪迴苦	六道生死長
如是諸惡過	謹慎好思量	願斷相續因	持心如金剛
定水洗煩惱	戒城自遮防	德如螺髻梵	去處見西方

誠觀外現威儀內起邪命法第八

邪命者。所謂淨治住處。嚴飾道場。羅列旛華。及諸道具。數爲洗  
剃。常帶袈裟。覆膊靴履。威儀齊整。緩行直進。下聲軟語。或復  
靜默。閉目低頭。衣鉢隨身。執着律相。然其內心常求名利。望他  
請喚。恭敬尊重。進戒度人。強爲師首。處在徒衆。希他依止。設  
解經律。問時生難。性多嫌恨惡眼視人。少見侵觸。不受其懺。口  
若發言。喜說譏刺。嫉他得利。如火燒心。情塵意垢。曾未除遣。  
雖坐繩床。起惡覺觀。攀緣亂想。念世欲事。令夜惡夢。漏失不淨。  
惡覺染意。熏本識藏。結惡業種。染能障淨。生死不絕。輪迴無際。  
受諸苦惱。三業不淨。乖八聖道。外白裏黑。順八邪徑。是名邪命。  
欺誑凡聖。如是觀察。得名淨心。偈曰。

口誦無常經 身作有常計 求望他利養 合眼未觀諦  
三衣唯欲好 不肯著破弊 內心至麤橫 外相真似細  
欺誑世間人 大悲爲流涕 賢聖不讚歎 善神不扶衛

誠觀外現威儀內起邪命法第八

23

淨心誠觀法

24

業障日夜增 戒定念念滯 雖有兩箇眼 復患一雙瞠  
誠觀取相恃善誑佛法第九

經曰。何者比丘名爲誑佛。若言我修慈悲。彼人瞋恚。我能布施某  
甲慳貪。我具淨戒。彼人犯戒。我勤精進。彼人懈怠。我有智慧。  
彼人太愚。我今樂靜。彼染憤鬧。我修威儀。彼人輕躁。我如法住。  
彼不如法。或恃隱山絕粒。納衣一食常坐不臥。塚間樹下。或講經  
律。善解法相。我有如是福德智慧。取此相者。即名我見。衆生見。  
壽者見。堅執是相。名爲誑佛。何者修道名不誑佛。若人修空無相  
無願三解脫門。亦不生著。唯觀世諦。虛妄顛倒。如幻如夢。無有  
一實。成此觀門。修戒定慧精進。不恃己能。輕他無德。柔和質直。  
謙下無諍。以此善根。迴向無上菩提。如是離相修者。名不誑佛。  
不誑佛故。得平等法。法眼明朗。能淨智障。不著空有。名爲淨心。  
偈曰。

八萬四千法 對治多種病 是名大方便 成就善巧行  
執相名誑佛 著我起見諍 比丘自沈溺 不能到究竟  
故修三脫門 法空資慧命 深觀緣集故 證智更歡慶

誠觀慢天懼人屏處造過法第十

凡夫僑諂。威儀不恒。人前斂攝。名爲諂詐。屏處造過。名爲僑逸。所謂破諸戒儀。私飲盜食。赤露裸跣。河池澡浴。露地便利。下氣出聲。摩捫屏處。仰眠伏地。蹲踞支頰。走驟顧眄。吟詠歌嘯。略要而言。故名僑諂。三業四儀。悉不如法。人前似人。屏處如鬼。一切天神。證知此過。身壞命終。生彌猴中。及鬼魅中。爲犯戒儀。果報對至。不欺闇室。即其義也。何以故。大業之樹。光明如鏡。衆生造業。於彼悉現。神天有二。一字同生。二字同名。人不見天。天常見人。業力持罪。不在晝夜。行者謹慎。屏露無差。大千世界。在佛毛孔。豈容屏過。賢聖不知。是故菩薩有八萬威儀。聲聞戒有

誠觀慢天懼人屏處造過法第十

25

淨心誠觀法

26

三千威儀。汝應修集。威儀庠序。屏露二處。一等用心。乃至失命。不虧仁範。如是持行。名爲淨心。偈曰。

賢聖出三界	常遊三界境	觀諸衆生業	如形對日影
智者慎威儀	持戒心勇猛	屏處無闕失	四念堅固秉
觀身如毒蛇	察心如冤家	身心是大患	覆罪如河沙
智者犯已悔	終不蓋疵痕	藏過嬰惡名	地獄受鐵叉
苦哉末法時	比丘比丘尼	剃髮雖改服	猶守貪瞋癡
假名優婆塞	諛諂優婆夷	名中喚五戒	實未具一支
口常誦藥方	心病不肯治	惡業覆障故	邪命求餘資
身見執著我	不覺即分離	亦不觀五陰	氣息若懸絲
人前麤斂攝	屏處踰須彌	唯懼人怪笑	不畏天證知
欲醉狂情發	行坐染心思	纏綿破重戒	命終墮阿鼻
地獄經一劫	劫盡更復移	此苦難堪忍	屏處最慎之

爲造狂業故	諸佛發大悲	犯欲須與樂	受苦無量時
經云人從生	即有二種天	晝夜與身俱	共人同受年
一念爲善惡	了了皆現前	惡多天減算	善強命長延
毘盧遮那佛	身界廣無邊	於一毛孔中	容受三大千
性照圓明徹	含生上福田	以衆屏多過	無緣起慈憐

誠觀女人十惡如實厭離解脫法第十一

女人十惡者。具說難窮。今略言之。令生厭離。一者貪姪。無量無厭。經云。十方國土。有女人處。即有地獄。一切障道。此爲是苦。女人欲男。如海吞流。百千萬劫。畢竟不滿。得一望一。心意狂亂。見可意男。悉願與交。猶火納薪。多益多熾。晝夜行坐。無忘欲時。受五道身。皆女形攝。先際已來。女根未轉。徹窮劫世。不免女身。故名貪欲無厭。二者嫉妬。心如毒蛇。家有婦類。悉生憎垢。口似相親。心如冤家。若同夫婿。更相規命。或作符厭。解奏毒藥。或

雇人殺害。或截支節。或毀面目。或削衣食。鞭打罵辱。方便除他。欲得獨立。故名嫉妬。三者諂曲詐親。凡見人時。未語先笑。口云憶念。心懷嫌恨。對於夫婿。思他男子。願夫遠行。或願早死。或與外人多種謀計。及見夫時。諂媚附近。身向心背。名爲詐親。四者放逸。但念綵衣裝粉釵釧。修治面目。望他愛念。耽著五慾。不避親疎。不畏後世畜生餓鬼。名爲放逸。五者口多惡業。出言虛誑。實情難得。凡所論說。虛多實少。喜道鄙弊穢惡之語。母女姊妹。不相避忌。兩舌鬪亂。傳送消息。數作呪誓。不畏殃報。屏罵尊長。窮逐諍訟。是名口多惡業。六者厭背夫主。若見端正男子。無羞追逐。或遣信逼。或自身往。坐臥不安。休廢生業。或結成病。或時託病。屏處飲噉。人前不餐。夫婿辛苦。勤勞得財。割減偷竊。供給傍夫。共作謀計。規欲殺害。見夫即瞋。冤家無異。是名厭背夫主。七者一切女人。多懷諂曲。實情難得。所以女人姦險。性器難

量。雖與對面共言。心隔千里之外。皆爲貪求世利。性逐澆浮。言是返引爲非。指虛翻將爲實。顛倒常理。每事多端。向背有無。情隨冷熱。或憑勢要。或黨親知。或因財色相誣。或爭名位而起謗。是以口如脂膏。心若錐刀。八者貪財不顧恩義。父母養育。劬勞難報。及嫁得夫。棄忘恩德。規父母物。潤益夫家。多得便喜。不稱便恨。父母飢寒。無心供給。是名貪財不顧恩義。九者慾火燒心。不恥父母。不懼刀杖。或未嫁妊身。或奔逐他逃。或拘引他人向家造過。恥辱父母。敗亂宗親。出嫁已後。復叛夫婿。夫亡未幾。更思後嫁。男女成人。猶棄改出。心迷欲醉。不避羞恥。女人過患。窮劫難盡。故名欲火燒心。十者女身臭惡。不淨常流。春夏熱時。蟲血雜下。經云。女根之中。二萬姪蟲。形如臂釧。細若秋毫。腥臊臭穢。私墮胎孕。懷妊產生。污穢狼藉。善神見聞。悉皆捨去。惡鬼魍魎。數來侵擾。如是鄙弊。愚人猶貪。棄捨念處。破佛淨戒。

死入獄中畜生餓鬼。長劫受苦。無解脫時。是名女人十種惡業。能觀能遠。名爲淨心。偈曰。

四百四種病	宿食爲根本	三塗八難苦	女人爲根本
生死無數劫	貪愛爲根本	賢聖解脫樂	離欲爲根本
四蛇成身界	顛倒想爲心	膿血徧九竅	淨想起貪姪
順情稱快樂	不信墮刀林	報生猪狗道	由前貪愛深
一切女人性	少實多諂曲	不念臭穢身	坐臥思念欲
邪視他男子	情喜相逼觸	百千萬億劫	畢竟不滿足
不羞慚父母	敗損諸親族	男少女多者	家衰數被辱
女具十惡業	死入鐵床獄	大錘刺女根	苦痛大嗥哭
地獄罪畢已	轉入母猪腹	噉糞居圜廁	臭泥生溷蟲
復被屠割苦	累劫罪難終	從畜入餓鬼	穢食恒不充
支節皆火然	骸骨不消融	貪欲暫時樂	受報苦無窮

誠觀檀越四事從苦緣起出生法第十二

損害生命名苦業。筋骨斯盡名苦緣。經曰。食者。從耕種鋤刈。收治颺簸。窖藏運輦。舂磨炊爨。蒸煮料設。供給奉送。又種菜造牆。溉灌田園。營爲醬酢。計一鉢食。出一鉢汗。汗在皮肉。即是其血。一食工力。出於作者一鉢之血。況復一生。凡受幾食。始從耕種乃至入口。傷殺無數雜類小蟲。是以佛戒日受一食。支持性命。寄過一生。衣服者。養蠶殺繭。取桑織絡。染浣裁縫。衆緣調度。無量辛苦。計上下衣資。凡殺幾蠶。出幾氣力。蠶繭入湯。受幾痛苦。是故佛教著糞掃衣。障弊陋質。糞得修道。房舍者。從起立牆壁。穿坑掘地。傷殺土蟲。斫伐材木。傷林樹蟲。造磚瓦時。殺泥水蟲。放火陶冶。殺柴草蟲。作人苦力。施主費財。飲食衆緣。勞損甚大。始成一房。是故行者依於塚樹。草蓐自安。念食是苦。節身而食。念衣殺命。著糞掃衣。念房舍臥具。從苦緣生。志樂頭陀。三月一

誠觀檀越四事從苦緣起出生法第十二

31

淨心誠觀法

32

移。念四事難消。少欲知足。經云。受檀越食。如飢饉世。食子肉想。受施主衣。如熱鐵纏身。入房舍時。如入鐵鑊。受床坐時。如熱鐵床。寧破此身猶如微塵。不以破戒之身。受人供給。三塗苦報。皆爲愛衣貪食。樂好房舍。若破戒因緣。還償施主。或作奴婢。鞭打驅策。或受畜生形。大毛帶角。生償筋骨。死還皮肉。負重力盡。起而復倒。虛受信施樂不足言。及償施主。苦過萬倍。是故教汝知慚知愧。慎護後世。莫破戒受施。名爲淨心。偈曰。

智者不貪食	貪食者無智	不念出糞苦	唯取人食利
自噉腦中涎	上盛向下棄	慧命斷四食	行者不貪嗜
比丘不樂靜	貪利受道具	追求心散亂	忽忽緣諸務
得一更望一	心規恒不住	宜應愧施主	臭身裏破絮
勸觀三脫門	離相自調御	少欲學知足	可依釋子賦

誠觀六道流轉受報無窮法第十三



三界衆生。無始已來。造善惡業。皆熏本識。成業種子。淨染合雜。數過塵算。受六道報。生死無邊。從地獄出。生諸天中。人中。鬼神畜生中。畜生者。先受蜎蠕動形類。一日一夜。百死百生。千死萬生。漸受大身。乃至摩竭魚等。長十千由旬。脫畜生身。受修羅身。天上福盡。復生地獄餓鬼中。經云。鬼有百千萬種。果報各別。六道人畜。各千萬種。色命苦樂。質像好醜。千差萬品。說難窮盡。今言人道本業來處。經云。受形顏貌端正。爲性淨潔。諸天中來。皮膚羸弊。不喜修施。畜生中來。形色醜惡。瞪瞞少智。地獄中來。舉動輕躁。獼猴中來。機捷調戲。妓兒中來。性多諂媚。鬼神中來。略而言之。廣即難盡。一道之中。有恒河沙因果。受一蟻身猶經多劫。況受餘形。及餘道中。是故生死不可窮盡。汝可諦觀捨身命時。受大苦痛。受身生時。復大苦痛。如是苦痛。已經塵劫。已捨無數身。已受無邊苦。愚者於中猶行放逸。汝可思之。勤

求出離。專精策勵。成無學果。證眞解脫。快樂安隱。能如是觀者。名爲淨心。偈曰。

一切世人欲受樂 遣修樂因不肯作 愚人得樂謂常樂 不覺命終被減削  
十五姿容言可愛 四十已去自疎索 縱使生天八萬劫 不免無常墮溝壑  
凡夫暫樂忘大苦 受大苦時復忘樂 所受苦樂皆空華 本來祇是情迷錯  
迷解悟道獲神通 永斷生死名眞樂

#### 誠觀八風力大智者不動法第十四

何者爲八。一利。二衰。三毀。四譽。五稱。六譏。七苦。八樂。一切衆生。爲八所動。不自安心。故名八風。何者動相。得利便悅。衰惱便憂。毀辱即瞋。譽談即喜。逢苦懷感。遇樂生逸。稱讚情歡。譏刺抱恨。此之八法。能令癡凡動搖不安。毀譽聲一。妄起二業。造三塗因。報四趣果。波浪五道。成就十纏。永處樊籠。何時解脫。然十界者。緣和故生。性空故滅。體解生滅。即無嫌恨。恨風不起。

罪火不燃。火不熾燃。心得清涼。無諸熱惱。以無熱惱故。名爲淨心。偈曰。

愚人貪美食	憎惡腹內屎	見生竟愛染	薄賤老病死
毀譽同響聲	瞋喜更互起	取相心高下	不識平等理
癡惑著音聲	凡夫共如是	死生糞與食	經文遣相比
耳被虛聲誑	神仙墮崖死	智者解真空	視聽不相似

### 誠觀身心相苦惱過患法第十五

身相者。六道異類。陰大假成。感現前果。酬過去因。故名身相。身相有八萬四千種形。依正二報。各各差別。一人徧受爾許種身。已經無量阿僧祇劫。今誠觀身。唯及人道。一人有九萬九千毛孔。八百種風。出入其中。八萬戶蟲。徧身充滿。四百四病。更互發動。三百六十骨節。迭相依持。百一十苦。無時不受。三十六種不淨膿血。合成陰身。九孔漏瘡。穢物流出。如上苦業。始成一人。賢聖

誠觀身心相苦惱過患法第十五

35

淨心誠觀法

36

捨離。如除惡病。故名觀身。心相者。一念之間。九十剎那。生住異滅。猶如電光。塵起識生。貪境招報。經云。貪欲心有二萬一千。瞋恚心有二萬一千。愚癡心有二萬一千。等分心有二萬一千。合有八萬四千塵勞。一百八種煩惱。五百四十種受有。九十八種使。故名觀心。若入安般觀法。心所漸息。乃至九次第定。還歸一眞清淨心中。此清淨心。名爲佛性。名眞常法身。無心之心。無相之相。如是觀察。名爲淨心。偈曰。

廢緣託淨境	正命自養身	諦觀虛空心	隨分得解脫
貪瞋若欲起	觀空以止遏	河沙煩惱根	定力能斷割
專定不修智	小乘非大慧	雖復苦身行	徒自歷年歲
定慧平等修	方知佛性體	直至大涅槃	何況世間諦

### 誠觀詐善揚名口清心濁法第十六

聖賢密行。內智外愚。凡夫狂癡。內愚外智。未有戒定。現戒定相。

彰揚善名。招引利養。隱匿垢過。外顯清白。常向道俗。說己功德。經云。此是無刀大賊。罪於劫掠。誑詐犯重。墮三惡道。詐善之人。具足五業。一者天神不護。證知缺戒受施。二者五千大鬼。常遮其前。唱言大賊。掃其腳迹。三者或於現世得大衰惱。四者常不值佛。生邪見家。五者自欺。亦欺誑他。自受苦報。施主無果。是爲五業。是以誠汝。推直於人。引曲向己。祕善陰德。似不能言。何以故。善如金玉。不用他知。惡如糞土。不須藏覆。糞土之法。貴在早除。細貨寶物。默然牢掌。知足之性。不求好名。少欲寂靜。寧懼惡響。計我之人。欲得名利。察身無我。名利安在。名利俱空。離我即實。滅於空實。正入平等。能捨名利。是爲淨心。欲得淨土。當淨其心。隨汝心淨。即佛土淨。名爲淨心。偈曰。

出家行非法 感得多衰惱 危苦隨念豐 安樂稱情少  
天神不愛護 魔事數來擾 死時懷恐懼 長劫墮惡道

善德深密藏 其猶摩尼寶 過惡悉除滅 理同苗邊草  
眞行不求名 戒定內明了 詐善覆藏惡 佛法中非好  
諦觀此誠文 繫意開懷抱 一切障道因 懺悔更莫造

### 誠觀衆生各著依正二報法第十七

三界衆生。住著堅牢。爲貪二報。障於解脫。非非想天。自謂涅槃。果報終極。懷增上慢。不逸三塗。色界衆生。貪著禪味。自謂安樂。更無過者。復念身光。宮殿明淨。我果最勝。欲界衆生。性多放逸。貪五欲樂。不覺無常。天福盡。還歸惡道。薄地凡夫。臭身隔陋。果報卑劣。起大憍慢。各恃我見。謂此人中常樂我淨。更無過者。畜生萬類。巢居穴處。各愛壽命。不願人天。不嫌己身。不希淨土。此雜類身。一身徧受。乃至毒蛇屏蟲之類。悉愛壽命。貪著住處。不覺身中同有佛性。然此諸身。無始已來。隨業轉換。無暫停時。汝可諦觀。當起厭離。勤求方便。脫於生死依正二報。漸證法身。

巍巍不動。至得如是覺悟。除諸疑惑。決定誠信。名爲淨心。偈曰。

三界六趣中	無數種衆生	形壽各差別	依正亦難明
今就人道修	對治隨分行	觀諸衆生類	憎愛心不平
憎者欲相殺	愛即長癡盲	貪瞋更互起	身壞墮三坑
各貪愛危命	處險未知驚	造因不畏果	寧知死復生
菩薩以是故	欲令衆生樂	衆生煩惱垢	方便爲除却
教觀十八空	六塵莫取著	四倒及五欲	禁斷更莫作
愚人貪現樂	不識當來惡	當來還是我	如何即疎薄
假使多身樂	一一填溝壑	爲此求常住	解脫無明縛

### 誠觀煩惱結使法第十八

一切生死障道苦業。皆因結使。如毘曇說。今略況言。令息覺觀。結有十結。使通三界九十八種。今恐文繁。少分喻說。結使者。阿梨耶藏。染分種子。名之爲結。受六道果報。名之爲使。使業發生。

誠觀煩惱結使法第十八

39

淨心誠觀法

40

增有漏種。如賊居險。潛伏聚集。名之爲結。持仗劫害。掠人財寶。名之爲使。貪瞋性習。依真潛伏。還緣起能。能劫戒財。取著諸塵。害於智寶。剎那相續。追求如使。無對名結。外觀名使。止慮名結。攀緣名使。繫念名結。役心名使。爲有結使。愛恚互生。由愛恚故。成取捨業。妄取捨故。癡翳轉厚。故障其慧眼。慧眼未開。名無明闇。闇心緣事。與顛倒相應。抱真常性。受生死苦。生死流浪。迷失正道。未見正道。名爲迷惑。無常常想。無樂樂想。無我見我。無淨見淨。如是狂錯。皆因結使。如是結使。造顛倒業。欲斷結使。即修五停觀法以對治之。安般守心。入三脫門。觀空離相。結使斷除。身心寂靜。故不起煩惱。煩惱滅處。名真解脫。解脫者。則大涅槃。欲起染心當自挫辱。挫不令散。名爲淨心。偈曰。

佛於波羅奈	三轉厭離行	授與四諦法	爲治煩惱病
永斷生死根	成就智慧命	修禪斷結使	照理心懸鏡

調心唯柔軟 持戒須彌硬 戒淨不悔恨 布薩心喜慶  
煩惱生結使 結使長煩惱 唯有禪定力 摧之如腐草  
結使妄取捨 譬厚障見道 故修五停觀 淨心內明了

### 誠觀十八界假緣生法第十九

何名十八界。身有六根。謂眼耳鼻舌身意。外有六塵。謂色聲香味觸法。中間生六識。三六假合。名十八界。云何名根。能生諸業。長養任持。故名根。云何名塵。空污淨心。觸身成垢。故名塵。云何名識。能了前境。妄起分別。名爲識。然此根塵互相涉入。名十二入。假緣生起。無真實性。衆生不達。謂內外入有常樂我淨。貪心熱惱。堅著執取。迷惑昏謬。不信聖道。順情生貪。違意起瞋。以此貪瞋。增長結使。此名凡夫十八界。學人十八界者。著三十二相名貪色。願聞說法。名貪聲。願上香供養。名貪香。願證大乘理教諸法實相。名貪味。願得清淨法身。名貪觸。願成一切智。名貪

誠觀十八界假緣生法第十九

41

淨心誠觀法

42

法。於此緣修之中。有善貪瞋癡慢。進求上地名貪。背捨劣行名瞋。情有向背名癡。見身證道名慢。故云學人十八界。義名智障。非有煩惱。非無煩惱。能知二種根塵。而熾然修入平等大道。無爲法中。故名淨心。偈曰。

塵境雖如幻	見色起慈悲	發意離諂慢	不失四威儀
六塵行空污	亦是行者師	除病不除法	七覺分修持
雖觀文字空	要須徧讀經	廣尋聖者義	般若漸得成
雖觀根塵空	和敬護人情	戒儀須具足	修德愼惡名
雖觀諸行空	對塵修五停	貪癡結使斷	寂滅心安寧
雖觀三界空	擇惡善須歸	修行擇覺分	離垢識是非
雖知三諦空	知諦義窮微	常依二諦說	與理不相違
十八界雖妄	出生於珍寶	觀解緣和義	不生亦不老
七地大菩薩	不名無煩惱	金剛心滅後	然證無爲道

誠觀修習安那般假相觀法第二十

夫坐禪要法。當有十種。

一者先託靜處。遠於水火禽獸音樂八難土境。令心安隱。二者厚敷草蓐。中高邊下。三者緩帶衣裳。節食少飲。四者結加趺坐。左手壓右手。閉目合口。齒不相嚙。端身平視。五者年少腹飽。當數出息。年老腹飢。當數入息。六者當觀出息去鼻遠近。入到何處。即知氣色。初麤後細。下至氣海。上衝於頂。七者從第一息。數至第十。若未至十。緣於異想。還攝取心。更從一數。八者手掌之內。置一明珠。繫念觀珠。心心相續。光明即現。九者如五停觀。對治現行五種煩惱。隨起隨治。隨分解脫。煩惱不行。令戒清淨。以戒清淨故。諸天歡喜。善神衛護。十者以修定故。舉動審諦。心不狂暴。謙下柔和。忍辱無諍。以是功德。增長智慧。臨命終時。他方菩薩。來迎神識。不遭苦患。諸天世人。所共稱讚。生於淨土。見

誠觀修習安那般假相觀法第二十

43

淨心誠觀法

44

佛聞法。永離三塗。受解脫樂。自餘諸法。如經所說。汝當受行。成戒定根。根性明利。名爲淨心。偈曰。

凡夫學道法	唯可心自知	造次向他道	他即反生誹
諦觀少言說	人重德能成	遠衆近靜處	端坐正思惟
但自觀身行	口勿說他短	結舌少論量	默然心柔軟
無知若聾盲	內智懷實貨	頭陀樂閑靜	對修離懈惰

誠觀善惡相資法第二十一

夫善者是諸惡之師。惡者是萬善之資。經曰。衆生能度佛。佛復度衆生。何以故。一切諸佛。皆因衆生而成佛道。經曰。高原陸地。不生蓮華。淤泥之中。出生華耳。又一切衆生。皆因於佛而得解脫。言諸惡者。謂五逆十惡。犯四重八重禁。謗諸賢聖。破正法輪。一闡提等。菩薩於此將爲福田。何以故。同體大悲故。於三塗四趣。代諸衆生受碎身等苦。軟語引導。教令懺悔。慈心拔濟。救令得樂。

廣開甘露。說微妙法。破彼惡業。善言誘示。令信十善。生人天處。復勸迴向無上菩提。因是功德。菩薩道成。即名衆生亦能度佛。又身中真性。由人弘顯。若無信力。聞思修等。諸佛菩薩雖具慈悲。無如之何。是故誠汝。凡是罪惡可賤衆生。惟起哀愍。不應瞋罵。生下劣心。又見上行清淨好人。不應偏重別請供養。何以故。善惡一如。性俱空故。於好醜色。二見平等。常觀空寂。入三解脫門。含生之類。皆如幻化。不著諸相。名爲淨心。偈曰。

欲得解脫樂	疎己常親他	行慈拔彼苦	自度生死河
若聞我與彼	便是分別魔	衆生壽者見	賢聖共譏訶
法界同一如	眞妄水共波	波者即是水	水者即是波
善門有多途	慈悲最是急	是故薩陀倫	世號常啼泣
憐愍衆生故	捨樂懷憂悒	護生成佛因	損生佛道澁
無財施貧厄	分食與減粒	若能修一慈	十六分不及

### 誠觀六道衆生善惡因果法第二十二

造因感果。數若恒沙。今略言之。一十八種。一者麤因果。二細因果。三大因果。四小因果。五輕因果。六重因果。七明因果。八闇因果。九香因果。十臭因果。十一延因果。十二促因果。十三愚因果。十四智因果。十五凡因果。十六聖因果。十七眞因果。十八妄因果。先舉現果。後出其因。麤果者。地獄畜生餓鬼等故。細果者。無色界四陰身故。大果者。色界梵天。及大龍。金翅鳥。摩竭魚等。三由旬者。節級乃至八萬四千由旬。及阿鼻地獄身等。善惡報差。大果所攝。小果者。下至翹飛蠕動。如小微塵。但動不能行故。輕果者。諸天報身。輕舉飛行故。五通諸仙。緊疾夜叉鬼神等故。重果者。如鐵圍山中。大蟒大獸。大海盲龍。身重如山故。明果者。人天中。有日月光。火珠身光等故。闇果者。如八大地獄。但聞忍苦聲。目不見故。香果者。上界諸天毛孔之中。皆出妙香。聞者心

悅。及依報處。宮殿等香故。臭果者。畜生餓鬼。不淨業鬼。人中臭物。無可比故。延果者。非非想天。壽命八萬劫故。促果者。如蜎蠓等生。生竟即死。不得暫停故。愚果者。凡夫鬼畜等故。智果者。衆生中爲導師故。凡果者。人天中未發道心故。聖果者。阿那含已下。及人天中五淨居處故。眞果者。三乘學人漏未盡故。妄果者。四大五陰。心緣集故。此等是六道中正果。何故名因。今次第相對說。麤因者。四重八禁。五逆十惡。謗大乘正法一切賢聖。用三寶財物。殺發菩提心衆生。破塔燒寺故。細因者。修禪定業。外道邪命梵行故。大因者。修四無量心善因故。破三聚淨戒惡因故。小因者。始脫地獄入畜生道故。輕因者。淨修梵行。十善業緣故。重因者。損害三寶。一闡提行者故。明因者。施燈明燭火。照佛形像。同十善道故。闇因者。毀他眼目。盜塔燈明。點滅經字。破人善業。污佛戒故。香因者。造旃檀塔廟。香木形像。香水灌像。沐

浴洗僧。香華供養故。臭因者。觸僧淨食。噉辛入寺。畜養豬雞。十惡業故。延因者。修不殺戒及四空定邪正二業故。促因者。殺生餘業故。愚因者。不信正法故。智因者。受持經律熏修般若故。凡因者。無明癡愛。貪五欲故。聖因者。戒定慧故。眞因者。本性清淨故。盲因者。諸根對塵生識故。論六道因果唯佛知盡。今說少分爲除疑網。深信因果。汝可思量種種善根收納善果。所行之善。皆迴向無上菩提成解脫分善。不取六道有漏善。如是修習諦知因果無漏。名爲淨心。偈曰。

可愍罪衆生	墮在無底坑	不知因果義	冥冥暗中行
抱眞未覺識	有眼猶名盲	眞樂無心趣	妄色共相諍
今爲除疑網	略指因果業	若能決定信	近三僧祇劫
以信因果故	常聞大乘法	應趣種性地	勇猛心勿怯



一切衆生。從無始來。受生死苦。迷失聖道。障於常住清淨法身。唯因識心貪取塵境。譬如家貧。智者教業。隨教修業。漸多財寶。有六惡賊夜來劫奪。持仗扣門。臨欲危害。財主即便牢下關鑰。牆高塹深。遂免劫失。身安財固。無衆苦惱。貧喻闡提身無一善。智者教業。喻佛經律。漸多財寶。喻集福智。六賊喻六塵。夜喻無明。劫喻貪愛。持仗扣門。喻根對於塵。牢下關鑰。喻修道人堅住四念及五停觀。牆高喻善知識及毘尼正法。塹深喻深心弘誓。不犯律禁。免劫者。喻全梵行戒。無缺無漏。諸佛歡喜。聖凡同讚。身安喻生善道人天淨土。及大涅槃安隱快樂。財固喻持戒守心。行不退菩提。諸波羅蜜。增長不失。法喻並顯。汝宜知之。比丘破戒。墮三惡道沈溺苦海者。皆由無善知識方便勸導。又不修習四念處法。五停觀法等。汝可依戒順此教授。煩惱魔賊不能得便。是故守心禁勒。根門幻惑塵賊。莫令前入。繫意觀空。離我我所。如是修行。名爲淨

心。偈曰。

六塵如狂賊	貪塵聲與色	妄情同惡馬	牢加禪轡勒
欲入佛法海	堅修戒定德	當住三空門	心淨樂靜默

### 誠觀世諦第一義諦法第二十四

世諦者。恃怙宗望。公卿爵祿。籍曹婚姻。文武伎藝。墓陵碑績。爭勳競封。取着空名。或爲財色。不惜軀命。輕身爲惡。更相殺戮。譽歎弓馬驕勇前鋒。自謂丈夫猛略身手。或侵妻奪職。傷殺於人。枉法受求。苦毒非理。噉食生命。耳貪絲竹。晝夜放蕩。不避親疎。飲酒醉亂。鬪打惡罵。迭相是非。或大怨讎。或逐財色。不慮艱阻。喜著色衣。食無時節。愛養臭穢膿血之身。不覺剎那念念生滅。老病既至。身壞命終。縫脹臭爛。虫出獸噉。神魂受報。生三惡道。百千萬劫無解脫時。是名世諦。第一義諦者。非貪上來虛妄等事。隨順菩提至無爲道。不同世間生死出沒待對。緣修非色至識。非眼

至意。非念工夫。見聞覺知。非名句味。清淨平等。猶如虛空。湛然凝寂。是名第一義諦。能觀世諦如幻化。諂誑癡凡。無有實性。畢竟於眞常道中作此解脫。故名爲淨心。偈曰。

世法誑癡人	謂實起貪瞋	若知無自性	慧性入童眞
凡夫歷生死	因愛取諸塵	若覺根塵空	性本是法身
貪愛名世諦	輪迴十二因	除貪即出世	此句佛親宣
第一義諦者	離相絕音聲	所言平等者	假名平等名
寄言以表諦	故說一切經	方知陰法空	對治滅心形

### 誠觀晚出家人心行法第二十五

夫晚出家者。有十種罪過。一者健鬪。世言竭斗。俗氣成性。我心自在。意凌徒衆。不受呵責。二者喜見他短。自謂精誠。所作事業。未必合道。短知短見。未解作解。言說常多綺語所攝。三者見師僧過。起嫌恨心。燒滅功德。修三惡道。四者輕慢他人。自謂丈夫。

誠觀晚出家人心行法第二十五

51

淨心誠觀法

52

身心剛強。不從折伏。五者舉動造次。威儀不整。高語大笑。無所畏忌。六者喜好瓶鉢。衣服鮮華。心無實德。貪求利養。七者心想散亂。憶俗時事。增長煩惱。不能如法對治。八者笑他破戒。自謂清淨。拘著相貌。不達眞理。專愚執見。諍論取勝。未具五德。畜養沙彌。唯貪其力。無心教授。九者不攝諸根。身疲神倦。放縱睡眠。不念明相。夜數惡夢。諸天不護。十者創入佛法。莫沾道味。憂慮疑惑。情思還俗。嫌薄三寶。反懷悔恨。既自還俗。憎出家人。輕賤行者。成闡提業。此之十惡過患。是地獄畜生餓鬼正因。汝當省察。名爲淨心。偈曰。

俗氣力方強	三毒至猛盛	年晚始入道	猶守本時性
不解將護他	造次強是正	自謂最精鍊	七支未必淨
喧喧逐講論	不肯修戒定	已說十種過	若犯須除屏
身無一德行	沙彌度三兩	有過不肯呵	犯罪不與杖

破齋犯僧前 污戒惡名響 人天漸漸希 三塗轉增長  
唯教作佛法 無軌令人做 自身如小兒 況能調剛強  
處衆好鬪諍 恒懷瞋恨想 四輩不恭敬 眷屬寧欽仰  
告慈忍。已前二十五篇。對治諸垢煩惱業。淨汝身心。心既淨矣。  
名自利行。今更爲汝略說大乘利他之行。汝可順菩薩道。自他俱利。  
名爲淨心。自除垢染。名眞淨心。自利利他。名廣大淨心。偈曰。  
如鳥欲遊空 長力養毛翅 菩薩欲利他 養德自先利  
三慧隨分明 然可授人智 淨心功行立 彼此俱對治

### 誠觀對發菩提心法第二十六

夫發道心。如滴水寄海。雖復微鮮。水終不失。經云。一搆乳頃。  
起大乘心。當成佛道。何以故。若修道時。百一十苦。悉堪忍之。  
所謂飢渴寒熱。蚊虻蚤虱。惡風暴雨。四百四病。呵責罵辱。惡口  
誹謗。水火劫盜。毒虫猛獸。鞭打侵惱難忍之事。悉皆甘受。不見

苦相。我身能忍。修行六度。修三空門。以是因緣故。至成佛果。  
經云。此國一日修道。勝他方一劫。何以故。此中多惱害。能忍者  
希。雖忍諸苦。功德易長。淨土無惱。佛道難成。於佛法中。若欲  
退心。當憶過去經無量劫。在地獄中。受熾猛火。碎身等苦。無逃  
避處。人中苦者百千萬億。不重於彼一瞬目頃。若不堅固勤行諸度。  
云何能盡生死大苦因緣。三塗罪人。若爲能救。若不能救衆生。何  
名慈悲。既無慈悲。菩提分法。依何爲本。若無根本。則遠種性。  
是故菩薩願盡後生。不破菩薩戒。聲聞之人。受形俱戒。汝可善知  
二戒差別。菩薩者。不染三界。不厭三界。求無爲道。不住無爲。  
常處生死。而無生死。何故不染三界。煩惱盡故。業不繫故。不厭  
三界。愍衆生故。大慈悲故。求無爲道故。欲自他利故。隨順大乘  
故。何故不住無爲。攝正法故。攝衆生故。何故常處生死。利行同  
事故。本願無盡故。而非生死業種盡故。得大自在入解脫海故。是

以不在此彼。不著中流。離於中邊心不住邊道。何以故。不守自性。法應爾故。常觀四諦十二因緣。生死苦聚。常起四弘誓願建大乘志。常以四攝饒益衆生。常修四無量心怨親平等。常行六度自他利益。常修萬德求無上菩提。爲成十力無畏不共之法。今唯略勸。廣恐文繁。能依此誠。名廣大淨心。偈曰。

若發菩提心	動念起慈悲	求於無爲道	身常處有爲
四攝調衆生	然可受三歸	譬如大暗處	月輪放光暉
自未脫諸苦	先當救艱危	無緣修四等	饒益與除衰
逢一百十苦	甘忍未曾瞋	亦不見苦相	又不見我身
身苦二空俱	忍法亦復然	諸苦及人法	三相滅隨眞
菩薩不住道	隨逐利益行	常處於三界	救濟苦衆生
迷道令見道	無明令得明	慧手執金錘	決膜療羣盲
滅者不永滅	生者不常生	生滅畢竟空	凡聖本來平

誠觀對發菩提心法第二十六

55

淨心誠觀法

56

願從今日後	乃成法界主	不起一慾心	貪染一切女
願從今日後	乃至成佛道	於一切衆生	不嫌不瞋惱
願從今日後	乃至證眞如	不起顛倒心	取著世六塵
願從今日後	乃至無爲岸	不起攀緣心	念諸惡覺觀
今發菩提心	生生超八難	弘誓要期已	道心勿退散

### 誠觀教化衆生法第二十七

既發道心。宜修萬德。宗旨綱要。不過二種。一者自利。二者利他。自利之行。略已宣說。利他之法。今亦少言。先垂慈悲。念三界苦。且就人道。化益衆生。愛言軟語。令其調順。識信因果。歸依三寶。量其根性利鈍廣狹。授與諸乘階梯正法。人乘天乘。三界果報。雖是有漏。堪受道化。從人天中。引入三乘無漏之境。或有衆生我慢放逸。貪瞋熾盛。不敬三寶。謗無因果。定知此業必墮地獄畜生餓鬼。即用方便善巧之談。悅可其心。令意歡喜。然後誘化示人天道。

教修十善五戒六齋。使離三塗。得人天果。若被罵打。灰土塗散。毀辱憎賤。悉能忍受。不生退悔。彼人知己。迴心慚愧。受其教化。或復出家。求無上道。學二乘者。爲說四諦。十二因緣。令生厭悔。知有爲過。四諦者。苦集滅道。是名四諦。如實解了是名諦。苦者是果。集者是因。何故先果後因。苦有三種。苦苦壞苦。此二麤惡衆生目驗。能起厭心。行苦一門。智人能解。此三苦者。徧十方界。故先說苦。苦從集生。教斷集因者。根本十惡。及有漏十善。滅者生死永盡。證解脫樂。知此滅度。云何可得。故須修道。道者。戒定慧等。從五停觀起。乃至三十七品。六波羅蜜。故名知苦斷集。證滅修道。十二因緣者。暗心無知。如盲人夜行曠野。失於正道。故曰無明。貪染世法名爲行。虛妄知見。故名識。識神入胎。向受生處。與不淨合。故曰名色。現陰成根。通識來往。故名六入。根塵相對故名觸。觸生違順。愛恚事成。故名爲受。於順情中貪染心

熱。故名爲愛。愛之不捨。故名爲取。取已屬身。成有漏業。故名爲有。有業既定。感後果報。故名爲生。生命不住。故名爲老死。老死復生。終而復始。千萬劫捨身受身。故名輪迴十二因緣。次教十善。對治十惡。人間短壽。殺生餘報。欲得長命。慈心勿殺。人間多病。食噉肉血。鞭打他人。二種餘報。欲得康強。斷食肉血。勿行楚撻。人間貧窮。偷盜餘報。欲得大富。竭情布施。斷除貪吝。人間卑賤。僞慢餘報。欲得尊貴。當勤恭敬。人間醜陋。瞋怒餘報。欲得端正。忍前毀辱。人間愚蒙。飲酒餘報。欲得智明。讀誦大乘。人間貪姪。鬼畜餘報。欲得梵行。常觀欲過。禁斷姪姪。人間惡性。龍蛇餘報。欲得調柔。和顏離諍。伏心遠離。有過思悔。每自呵責。人間邪見。謗法餘報。欲得正法。近善知識。此是十種正對治行。何因說餘。不言正報。餘者現見。即能起厭。地獄餓鬼。不現見故。恐疑不信。畜生一道。雖在目前。實見正報。癡人猶言天生供厨。

疑非是業。此之十事。人間惡重。教未信者。令心開解。恐墮三塗。永失人路。是以先化。令生天上。受諸快樂。儻佛出世。先度諸天。下劣之人。聞大乘實相空理。心驚迷闇。或起誹謗。是故諸佛先化未解。拔凡入聖。譬如有坑。深百千丈。下有屎尿。諸虫膿血。寒熱飢渴。鞭打繫縛。斬斫誅戮。憂悲嗥哭。苦惱臭穢。充滿其中。有癡衆生。樂著此坑。將爲快樂。智者慈悲。不避艱險。入坑誘引。令使出離。千萬億言。既不從用。不信坑外更有勝處。唯謂此坑是常住法。爾時智者。內心思量。坑裏穢惡。苦惱難居。我要化盡。然可出坑。於恒沙劫。同止坑中。不辭勞倦。坑人瞋恨。反生誹謗。種種示導。都無出心。坑喻三界。下喻凡夫。諸苦不淨喻五陰身。智者喻佛。化喻慈悲。哀衆生難拔。喻坑下人天乘。已前四諦十二因緣。是名二乘。破相六波羅蜜緣修十地。是名大乘。如是大品華嚴廣分別說。又泯道諦及十八空。入平等理不思議海。離於形名。

是爲佛乘。如思益維摩信力。入印首楞嚴經等。住真空理。語斷行滅。如江河萬流。若入大海。失本色相。道諦緣修方便淨法。亦復如是。汝當修集無緣慈悲。隨力勸化。自勸勸他。於身命財。爲大乘故。莫生吝惜。爲一衆生。經多年月。設多方便。說多佛法。令使悟解。背生死苦。得自在樂。爲多衆生。亦復如是。是名利他教化衆生。雖有此益。勿生一念六相之心。譬如幻人。爲幻說法。若見我說。彼受我化。則有我人衆生壽者。即是魔心。生死之心。障礙之心。自纏縛心。汝但發起菩薩之心。莫生怯弱。譬如百足之經。始緯一絲。雖未成疋。非不貫攝。得其頭緒。即是發趣起作之始。漸漸累功。自至端疋。利他六度者。爲除他惱。自行布施。持戒。忍辱。精進。定慧等。亦復如是。先自行道。然後化他。他即信伏。自造惡行。教他作善。信用語者。無有是處。或口勤說十二部經方便善巧。種種譬喻。令人信解。或以身勸。自修萬德一切善業。令

他做習。或以意勸。思念教導。作易解章句。布施衆生。利他誦持。起正信解。名爲利他。說法解釋五乘。自成辯才。淨於口業。善現威儀。恭敬禮拜。供養三寶。勤苦利他。自成相好。淨於身業。若念衆生迷惑忍苦。思欲救濟。淨於意業。利他令衆生淨信。反資己身。成三眞業。明知利他。還是自利。雖復利他。恒自益己。然受化者。非不蒙潤。若化百千無數衆生。智慧轉增。漸成四辯。不同財施損滅竭盡。說法之時。不念財食。是故世尊說法。未曾先說。後受供養。教化功德。高於須彌。深於巨海。以此利他之因。當成佛果。能如是學。名廣大淨心。偈曰。

若見重愚癡	莫說甚深法	聞者生誹謗	受苦百千劫
宿世無習氣	聞法疑恐怯	我見計斷常	未信三世業
量根授法藥	是名大智人	心邪無正見	聞法反生瞋
如蠶吐絲繭	罪業復自纏	以不聞法故	常爲愛網牽

誠觀教化眾生法第二十七

61

淨心誠觀法

62

一切眞如門	巧用方便起	凡欲化衆生	愛語令歡喜
菩薩同體悲	觀他如我已	柔和善將護	似乳投於水
或時須多言	有時須寂默	知時名法師	見面量根力
若不觀機性	不名具智德	冥之於心內	所爲成法則
有用軟語時	有時須麤獷	軟根軟語調	伏強現威猛
種種調衆生	對治種種境	如是巧方便	唯有菩薩乘
凡欲教化人	慈悅勿使瞋	觸情起毒心	即造地獄因
無聞非法者	授戒令生人	且免三塗苦	漸引歸正眞
爲說四諦法	顯示十二因	令知生死苦	正趣涅槃門
有大性欲者	入理爲談論	破相十八空	身中無世尊
五乘漸分化	拔斷無明根	是名利他義	順教報佛恩

誠觀佛性不二非有無含中道不著中法第二十八

既發道心。復自他利。須知衆生同有佛性。略說十種廣在諸經。一

者生死煩惱從眞性起。喻如大水。本淨湛然。爲因風故遂生波動。後因大寒。乃結成冰。衆生佛性。本淨如水。由覺觀風。波浪生死。貪愛堅固成煩惱冰。欲顯佛性者。慧火融冰。禪定息波。冰消波止。水即清淨。佛性影現。二者如金在鑛。羸弊無堪。於後融銷。金始顯現。寶中最上。無能嫌者。衆生佛性。在煩惱鑛。戒定慧火。練出眞性。法界之中。最上無比。三者如牛未產。乳血和雜。緣成始停。構取煎煨。乃至醍醐。明淨隨器變色。不守自性。衆生佛性。爲煩惱合。如雜血乳。假緣修治。漸至佛果。發起神通。隨衆生變。同願救苦。不守自性。四者喻如一人行千萬里。經多屋宿。屋雖多種。人是一人。屋喻五陰。人喻佛性。衆生佛性。經五道陰。陰雖差別。佛性是一。人別屋別。故名不一。人常一人。故名不二。冰凍未融。水即非有。冰消即水。故名非無。佛性道理。不一不二。非有非無。五者四諦十二因緣。四等六度。三十七品道諦所攝。名

誠觀佛性不二非有無含中道不著中法第二十八

63

淨心誠觀法

64

爲佛性。六者四親近法。名爲佛性。一親近善知識。二親近正法。三親近靜思。四親近如說修。離此四法。得成佛者。無有是處。七者佛性非邊。中道是也。衆生五陰。託佛性起。故名非斷。生滅如幻。名爲非常。人依五陰。乃得修道。陰藉神持。方能存立。八者離眞妄者。名爲佛性。立眞辯妄。對妄表眞。若滅妄法。眞名不生。佛性清淨。智不能知。識不能識。九者能說之法。顯於無說。無說之空。亦不可取。故名佛性。十者空平寂靜。與有亂俱行。體離於形名。常顯名色。是爲佛性。無礙之智。與癡凡一如。如眞解脫。本從凡起。雖有此喻。佛性之義。唯佛能知。略說十種。廣恐文繁汝能觀解。名眞淨心。偈曰。

一切諸衆生	平等有佛性	佛性雜煩惱	塵染未清淨
戒定除客塵	即離生死徑	性隱名生死	性顯名賢聖
五陰雖流轉	佛性本來定	欲知佛性者	勵已修八正



初發道意走覓道 心邪曲見未正直 江南江北求菩提 菩提共行不相識  
身外覓訪既疲勞 一處靜思頓止息 忽然醒悟覺少分 乃知菩提身中匿  
解煩惱性空如幻 未死不久自窮極 涅槃生死同一如 道理不二亦不即  
若能明了根塵法 長養無礙神通翼 觀察五陰假緣生 自性本來包十方

### 誠觀智差別福田不等法第二十九

已起大心。修自他利。兼觀佛性。此是因相。次須觀果。果是佛智。經云。滿大千界衆生智。不及一須陀洹智。世界須陀洹智。不及一斯陀含智。世界斯陀含智。不及一阿那含智。世界阿那含智。不及一阿羅漢智。世界阿羅漢智。不及一辟支佛智。滿十方世界辟支佛智。不及一種性菩薩智。如是節級。不及一十地菩薩智。滿十地菩薩智。不及如來一念之智。是故世尊智慧大海。恒沙大士咸共思量。不知如來舉足之事。是故汝當一心精進求佛智慧。若以飲食衣服臥具湯藥。施一世界凡夫衆生。不及布施一須陀洹。布施世界須陀洹。

誠觀智差別福田不等法第二十九

65

淨心誠觀法

66

不及一斯陀含。乃至節級不及一辟支佛。不如供養一種性菩薩。節級乃至不如初地聖人二地三地四五六七八九十地。布施此諸三賢十聖。滿足一劫。不及供養如來一食果報。何以故。如來有大智慧故。消諸天世人供養恭敬。智慧多故。消於多供。無一智慧。地上水菓尙不得消。何況人食。汝當領解誠之本意。修習淨戒。莫令缺犯。以戒淨故。易得禪定。定心清淨。發生智慧。福德具足。成五分法身。一切種智。諸佛智力。今更略說。十方世界一時細雨。經多年月。一瞬眼頃悉知滴數。十方江海總知斛斗。十方鐵圍須彌大地普知斤兩。法界刹土爾許塵數。或徧虛空界衆生心行悉知善惡。一一衆生知某劫作佛。十方山海天地日月置於掌中。遊行世界。帝釋梵王不覺來去。十方水火吸著口中。水不滅火。火不損口。若欲具說。不可窮盡。如是神力從五停觀生。從三十七品生。從四無量心生。從六波羅蜜生。從大乘十地生。是名諸佛智力神力。從斷財色五停

觀生。因起已來。諸行次第至今佛地。即是此誠始終說相。菩薩別行前後階位。如華嚴說。汝可發起慈悲種子。布衆生田。恭敬種子。置三寶田。福智芽生。乃成佛樹。蔭覆法界。十方華敷。結無上果。從發道心。畢至究竟。其間功用悉名智障。到如來地二障永盡。反望生死。如幻如夢。本無真實。誑惑癡人。唯佛正覺。故稱徧知。汝今應取如來智海。勇猛修入。名決定淨心。偈曰。

大千世界人	自謂根性利	悉集共思量	不及信行者
世界信行人	衆議出情端	多時共思議	不及須陀洹
世界須陀洹	議論共宣談	見解之慧力	不及斯陀含
節級辟支佛	節級十地人	節級智差別	不及如來身
布施節級聖	果報節級大	布施十地聖	不及福田最
是故汝當知	佛智最窮深	福田難思議	信者名淨心

### 誠觀內行密修囑付殷勤受持法第三十

誠觀內行密修囑付殷勤受持法第三十

67

淨心誠觀法

68

告慈忍。父母七生。師僧累劫。義深恩重。愚者莫知。汝始入道。方復別師。且暮念汝。汝思吾否。彼若依止得好人。日夜有宜。如無善匠。心何所寄。汝既出家。受如來戒。失意之間。長劫受苦。今時末法衆生心薄。背恩絕義。易厭師僧。樂獨遊居。適情自在。恐不如法。墮於惡道。無那纏懷。撰製斯誠。略述近標。表宣人事。諸餘部帙。大家共知。當道經論。汝應自有。大乘要義。率土咸同。更欲顯示。恐卷軸繁滋。直洗汝心。猶過千句。汝可如渴得水。隨飲莫辭。靜處披讀。何勞他見。我之微意。汝未能知。縱使世人亦不諳悉。唯有天眼者。證知我心。汝可依行。終不謬誤。何故靜尋。不令人看。唯聖與聖。物以羣分。愚智別類。方以類聚。今時學者。意見差殊。迭相是非。破他自譽。讚己毀人。邪情怪笑。無急之語。競共書持。要切之言。賤而輕薄。欲得廣知。不欲廣行。願多達解。衆中獨出。規貪虛響聰明聲息。背捨身心。野偷名利。三塗即至。

終無免期。經云。譬如一日挑千人眼。如是日日挑多眼睛。此人實行罪重於前。爲此避護。唯汝自知。非是誠中多有過失。世有難語。並語。壞彼語。華綺語。越理語。衰語。番語。牒語。迷人語。惱亂語。差悶語。今時後生。專學此語。在前解者。欺未解者。直習戲論。何關修道。口勞神疲。心無一潤。煩惱更增。吾我轉大。一生勤苦。損功無福。意在名利。未詳淨心。假名得利。何由可消。如大猛火。難受難近。又復如法語。易解語。身心語。戒律語。要切語。離罪語。治障道語。入理語。成就語。若見如是等語。即拍手大笑。眼不欲視。何況受持。汝當緩尋字字。思量一字之中。含無量義。若直讀之。少時即徧。依誠起行。一生不徹。貴在快行。不在快讀。手執眼看。宜應垂淚。生難遭想。如見世尊。何以故。宣揚勸發。順聖道故。教汝淨心。趣菩提故。凡經論誠。義有二種。一者順理。如來祕藏空平等法。泯相入真。冲玄密境。補處莫知。

二乘不測。是名順理。二者文義易解。讀時滑利。或作偈頌。美妙悅心。名爲順情。相欲似淺。因斯入深。廢見皆是。立見悉非。譬如大海。初入沒踝。漸進無涯。底不可得。如七日嬰兒。未消上饌。庸野田人。豈乘輦。未食便餐。必被噎塞。非乘強乘。智者呵責。但佛法大海。無智莫入。寶臺千仞。非階莫升。始入道門。未修戒定。越學空宗。佛不隨喜。積世鄙夫。輒持國璽。王若見者。必當重罰。要從五停。除惱證聖。今此誠者。體無華巧。愍汝情深。指事約勒。又恨冒沾師首。愚於教訓。故遣苦切入心之語。如對面言。成汝道行。既自知已。轉教同學。及餘智者。吾甚疾劣。宿不保安。儻不見汝。此當遺囑。旨不殷勤。如誠淨心。

### 淨心誠觀法（終）

## 附錄 二十五護戒善神說明表

摘錄「灌頂三歸五戒帶佩護身咒經」——東晉西域三藏帛尸梨密多羅譯

佛云：若持五戒者，有二十五善神衛護人身，在人左右，守於宮宅門戶之上，使萬事吉祥。

護戒善神	護衛責任
一、護不殺戒五神： 1 察芻毘愈他尼 2 輪多利輪陀尼 3 毘婁遮那波 4 阿陀龍摩坻 5 婆羅桓尼和婆	護持戒人，身辟邪除惡。 護持戒人，身六情悉令完具。 護持戒人，腹內五臟平調。 護持戒人，血脈悉令通暢。 護持戒人，指無所毀傷。
二、護不盜戒五神：	

附錄

7 1

淨心誠觀法

7 2

護戒善神	護衛責任
6 坻摩阿毘婆馱 7 阿修輪婆羅陀 8 婆羅摩亶雄雌 9 波羅門地鞞哆 10 那摩吁多耶舍	護持戒人，出入行來安寧。 護持戒人，所噉飲食香甜。 護持戒人，夢安覺歡悅。 護持戒人，不為蠱毒所中。 護持戒人，不為霧露惡毒所害。
三、護不邪淫戒五神： 11 佛馱仙陀婁哆 12 鞞闍耶藪多娑 13 涅坻醯馱多耶 14 阿邏多賴都耶 15 波羅那佛曇	護持戒人，鬪諍口舌不行。 護持戒人，不為瘟瘡惡鬼所持。 護持戒人，不為縣官所得。 護持戒人，舍宅四方逐凶殃。 護持戒人，平定舍宅八神。
四、護不妄語戒五神： 16 阿提梵者珊耶	護持戒人，不為塚墓鬼所嬈。

護戒善神	17 因臺羅因臺羅 18 阿伽嵐施婆婆 19 佛曇彌摩多哆 20 多賴叉三密陀 五、護不飲酒戒五神： 21 阿摩羅斯兜嚕 22 那羅門闍兜帝 23 薩鞞尼乾那波 24 茶鞞闍毘舍羅 25 伽摩毘那闍尼佉	護衛責任
	護持戒人，門戶辟除邪惡。 護持戒人，不為外鬼神所害。 護持戒人，不為災火所延。 護持戒人，不為偷盜所侵。 護持戒人，若入山林不為虎狼所害。 護持戒人，不為傷亡所嬈。 護持戒人，除諸鳥鳴狐鳴。 護持戒人，除大鼠變怪。 護持戒人，不為凶注所牽。	

觀此表可知，人能好持五戒，即有二十五位善神，衛護左右，自然災消福至，一切吉祥。又何必痴痴然，到處乞神問卜，捨近求遠耶？

附錄

73

淨心誠觀法

74

### 附錄 守護三歸三十六部神王所主表

摘錄「灌頂三歸五戒帶佩護身咒經」——東晉西域三藏帛尸梨密多羅譯

佛言：梵志，以三自歸竟，是為真正弟子，不為邪惡所干嬈也。佛告梵志，汝能一心受三自歸已，我當為汝及十方人敕天帝釋所遣諸鬼神，以護男子女人等輩受三歸者。梵志因問佛言，何等是也，願欲聞之開化十方諸受歸者，佛言：如是灌頂善神，今當為汝略說三十六神。

10 彌栗頭提波羅	邪鬼	11 彌栗頭呵娑帝	傷亡	12 彌栗頭不若羅	冢墓
7 彌栗頭伽婆帝	愚癡	8 彌栗頭悉坻哆	瞋恚	9 彌栗頭菩提薩	姪慾
4 彌栗頭抗陀羅	腹滿	5 彌栗頭陀利奢	癰腫	6 彌栗頭阿婁呵	顛狂
1 彌栗頭不羅婆	疾病	2 彌栗頭婆呵娑	頭痛	3 彌栗頭婆邏波	寒熱
守護神王		守護神王		守護神王	
所主		所主		所主	

13	彌栗頭苾闍伽	四方	14	彌栗頭伽隸娑	怨家	15	彌栗頭羅闍遮	偷盜
16	彌栗頭修乾陀	債主	17	彌栗頭檀那波	劫賊	18	彌栗頭支多那	疫毒
19	彌栗頭羅婆那	五瘟	20	彌栗頭鉢婆馱	蜚尸	21	彌栗頭三摩馱	注連
22	彌栗頭辰帚馱	注復	23	彌栗頭波利陀	相引	24	彌栗頭波利那	惡黨
25	彌栗頭虔伽地	蟲毒	26	彌栗頭毘梨駝	恐怖	27	彌栗頭支陀那	厄難
28	彌栗頭伽林摩	產乳	29	彌栗頭阿雷伽	縣官	30	彌栗頭闍利陀	口舌
31	彌栗頭阿伽馱	憂惱	32	彌栗頭阿訶婆	不安	33	彌栗頭娑和邏	百怪
34	彌栗頭波利那	嫉妒	35	彌栗頭固陀那	呪咀	36	彌栗頭韋陀羅	厭禱

佛語梵志，是爲三十六部神王。此諸善神。還有萬億恆河沙鬼神以爲眷屬，陰相番代以護男子女人等輩受三歸者當書神王名字帶在身上下行來出入無所畏也辟除邪惡消滅不善。